

Namminersorlutik Oqartussat nalunaarutaat, kulturikkut eriagisassat allat pillugit sumiiffimmik Kalaallit Nunaata kitaanii Aasivissuit - Nipisallu eqqaanni

Eqqissisimatitsisarneq aamma allatigut kulturikkut eriagisassanik kulturikkut kingornussatut illersuineq pillugu Inatsisartut Inatsisaanni nr. 11, 19. maj 2010-meersumi §§ 24, imm. 5 aamma 32, imm. 1 naapertorlugit aamma Nunatta Katersugaasiviata Allagaaqarfiatalu tamanna pillugu inassuteqarnera naapertorlugu kiisalu Pilersaarusiorneq aamma nunaminertat atorneqartarnerat pillugit Inatsisartut inatsisissaat nr. 17, 17. november 2010-meersumi § 21, imm. 2 naapertorlugu aalajangersarneqarpoq:

Sumiiffimmik killiliineq

§ 1. Sumiiffik ilanngussami 1-imi aamma ilanngussami 2-mi koordinatini nalunaarsorneqartut kulturikkut oqaluttuarisaanermi immikkoortutut sumiiffittut isigineqarpoq, taamaattumillu kulturikkut kingornussatut illersugassatut isigineqarlutik.

Tikinneqarsinnaaneranut tunngasut atuinerlu

§ 2. Sumiiffimmut kulturikkut kingornussat inissisimaffigisaannut inuit tamat ornigussinnaatitaapput, killiliinerit uani nalunaarummi pineqartut iluanni.

§ 3. Kulturikkut oqaluttuarisaanermi sumiiffiit ilaasa tikinneqarsinnaanerannik ersarinnersumik aalajangiinermi akiliummik akiliinissaq piumasaqaataasinnaavoq, taamaattoq tak. imm. 2.

Imm. 2. Akiliuteqartitsisoqarsinnaassanngilaq inunnut, pisortanut, suliffeqarfinnut il.il. inuussutissarsiutitik naapertorlugit imaluunniit inatsisit allat naapertorlugit sumiiffinnik tikitsisinnaasussaasunut.

Imm. 3. Akiliut kiap pissaneraa akiliutillu annertussusia Kultureqarnermut Naalakkersuisoqarfiup aalajangissavaa.

Imm. 4. Akiliut siunertaqarpoq tamakkiisumik imaluunniit ilaannakuusumik aningaasartuutitut matussusiisussatut, aserfallatsaaliinermut, ingerlatsinermut aamma sanaartukkanik pilersitsinernut, pilersinneqarsimasunut sumiiffiit orninneqarsinnaanissaat siunnerfigalugu.

§ 4. Kulturikkut oqaluttuarisaanermi sumiiffiup ilaannik sumiiffilluunniit ataatsimut isigalugu kusanaallisaataasinnaasunik aseruisinnaasunilluunniit sumiiffiup ilaani sumiiffimmiluunniit tamarmiusumi ingerlatsisoqqaqusaanngilaq, taamaattoq tak. imm. 2.

Imm. 2. Kalaallit Nunaata Katersugaasivia Allagaateqarfialu immikkut ittumik pissutissaqartillugu imm. 1-imik saneqqutsinissamut akuersisinnaavoq.

Imm. 3. Kulturikkut oqaluttuarisaanermi sumiiffimmik tikitsisarnerit aamma atuisarnerit kommunimi pilersaarut aamma aqutsinermi pilersaarut sumiiffimmut suliarineqarnikuusut ataqqillugu pisassapput, tak. §§ 8 aamma 9.

Imm. 4. Ataqqillugu imm. 3-mi eqqaaneqartoq aqutsinermut pilersaarut sumiiffik kulturikkut kingornussa qarfusoq sulī ator neqarsinnaavoq ukioq naallugu aamma sunngiffimmi illuaraqarfittut aamma inuussutissarsiutinut, piniarnermut aalisarnermillu sammisanut.

Mingutsitsineq aamma igitassanik, sukujunnik, atortunik assigisaanni nunaannarmut qimagaaqusaannginneq

§ 5. Imerk, sikumik, qaqqanik nunamillu mingutsitsinissaq imaluunniit eqqagassanik sunilluunniit qimatsinissaq inerteqqutaavoq.

Imm. 2. Piffissap ilaanni ator neqartarnerannik tunngavilersuutissaqanngippat pequtinik, atortunik assigisaannilluunniit nunami qimatsinissaq inerteqqutaavoq, tassunga ilanngullugit inuussutissarsiornermi atortut.

Naasoqassuseq nunalu

§ 6. Eqqaassanngikkaanni § 4, imm. 4-mi pissutsit eqqaaneqartut, inerteqqutaavoq naasunik innarliinissaq imaluunniit nunataanik allannguinnissaq, taamaattoq tak. imm. 2.

Imm. 2. Naasunik taamaallaat katersisoqarsinnaavoq tamanna ingerlanneqarpat sumiiffimmi avatangiisinik innarliinani.

Tupertarneq ikumatitsisarnerlu

§ 7. Tupernerit ikumatitsinerillu piffissani sivikitsuni taamaallaat pisinnaapput, sumiiffimmilu naasoqassuseq mianeralugu pissallutik.

Imm. 2. Nunaminertat tamatigut tuperfigineqarsinnaasut Nunatta Katersugaasivia Allagaateqarfialu tusarniaavigeerlugu Qeqqata Kommuniani Kommunalbestyrelsimit toqqarneqarsinnaapput.

Kisarsimaartarneq, nunamut ikaartarneq, tupertarfinnik ataavartunik pilersitsineq aamma angalasinnaaneq

§ 8. Qeqqata Kommuniani kommunalbestyrelse kommunimut pilersaarummi aalajangersagaliorsinnaavoq makkunuuna:

- 1) Kulturikkut oqaluttuarisaanermi sumiiffiup ilaanni kisartarneq angallatinillu uninngatitsisarneq.
- 2) Nunaliartarneq.
- 3) Tapersimaartarfinnik aalajangersimasunik pilersitsisarneq, paasissutissanut allagarsiivik, perusuersartarfiit aamma illuaraq ajornartoornermi isersimaffigineqarsinnaasoq pillugit.

4) Aalajangersimasuni nunaminertap ilaanni aqqusiani kulturikkut eriagisaasup ilaani angalasinnaanerup killilersorneqartarnera.

5) Qamuteralannik aamma nunakkut angalaarutininik allanik suniluunniit (ATV'-nik) atuisarneq kulturikkut oqaluttuarisaanermi sumiiffimmii Nunatta Katersugaasiviata Allagaateqarfialu inassuteqaatai naapertorlugit.

Ingerlatsineq nakkutilliinerlu

§ 9. Nunatta Katersugaasivia Allagaateqarfialu Qeqqata Kommuniani kommunalbestyrelse isumasioqatigalugu soqutigisaqartullu suliamut attuumassuteqartut peqataatereerlugit kulturikkut oqaluttuarisaanermi sumiiffimmik aqutsinermut pilersaarusiussaaq. Aqutsinermut pilersaarusiaq nutarterneqartassaaq.

Imm. 2. Ingerlatsinermut pilersaarut ingerlaavartumik nutarterneqartassaaq.

Imm. 3. Ingerlatsinermi pilersaarut aqutsinermi atortuuvog, ingerlatsivinnit atorineqartussaq qularnaarumallugu kulturikkut oqaluttuarisaanermi naleqartitat pigiinnarneqarnissaat aammalu illersorneqarnissaat, ilutigisaanillu tamat sumiiffimmut ornigussinnaatitaassallutik sumiiffik sulii atorumallugu aammalu ineriartortikkumallugu.

Imm. 4. Aqutsinermut pilersaarut ukuninnga allaaserinninnermik minnerpaamik imaqassaaq:

- 1) sumiiffimmik ataatsimut isigalugu taassumalu ilaanik aqutsinermi kina akisussaasuunersoq,
- 2) inatsit sorleq kulturikkut oqaluttuarisaanermi killilersuinersoq,
- 3) kulturikkut oqaluttuarisaanermi naleqartut suut kulturikkut oqaluttuarisaanermi sumiiffimmik illersuinnermi tunngaviunersut,
- 4) suut annertuut akornusiisinnasut kinguneqarnersut imaluunniit kinguneqarsinnaanersut kulturikkut oqaluttuarisaanermi sumiiffimmi,
- 5) sumiiffimmi inuussutissarsiornermik ineriartortitsinissamik suut kissaataanersut,
- 6) kulturikkut oqaluttuarisaanermi naleqartunik navianartorsiortitsisut pinngitsoorniarlugit inuussutissarsiornermillu ineriartortitsinissamik kissaatigineqartut ingerlannissaannut aqutsinermi iliuutsit suut aallartinneqarsimanersut aallartinneqarniarnersulluunniit,
- 7) aqutsinermut pilersaarut piviusunngortinniarlugi aningaasatigut inunnillu isumalluutit suut immikkoortinneqarnersut immikkoortinniarneqarnersulluunniit aamma
- 8) ingerlaavartumik nutarterisarnissaq siunertaralugu aqutsinermut pilersaarummik piviusunngortitsinermik qanoq misissuisoqartassanersoq nalilersuisoqartassanersorlu.

§ 10. Kalaallit Nunaata Katersugaasiviata Allagaateqarfialu Qeqqata Kommuniani kommunalbestyrelse suleqatigalugu nakkutigissavaat nalunaarummi matumani aalajangersakkat malinneqarnissaat, taamaattoq tak. imm. 2.

Imm. 2. Qeqqata Kommuniani kommunalbestyrelsip nakkutigissavaa kommunimut pilersaarummi § 8 naapertorlugu kommunalbestyrelsip najoqqutassatut aalajangersagaasa malinneqarnissaat.

Pineqaatissiissutit

§ 11. §§ 4-6-imut aamma § 7, imm. 1-imik uteqattaartumik annertuumillu unioqqutitsinerit Kalaallit Nunaanni pinerluttulerinermik inatsit naapertorlugu akiliisitsinermik kinguneqarsinnaapput.

Imm. 2. Unioqqutitsineq inatsisit naapertorlugit inummit imaluunniit pisortatut oqartussaasunit pilersinneqartoq pinerluttulerinermik inatsimmi aalajangersakkat naapertorlugit akisussaatsinermik kinguneqarsinnaavoq, Kalaallit Nunaanni pinerluttulerinermik inatsimmi aalajangersakkat naapertorlugit.

Atuutilersitsineq

§ 12. Nalunaarut ulloq 1. februar 2018 atuutilerpoq.

Namminersorlutik Oqartussat, ulloq 30. Januar 2018

Doris J. Jensen

/

Lone Nukaaraq Møller

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut